

18 AUG 2002

Mahathir-Bot Laju/I

BOT LAJU F1 PERKENALKAN LAGI MALAYSIA KEPADA DUNIA, KATA DR MAHATHIR

KUALA LUMPUR, 18 Ogos (Bernama) -- Perdana Menteri Datuk Seri Dr Mahathir Mohamad berkata Grand Prix Bot Laju Formula Satu Dunia di The Mines Resort City merupakan satu lagi acara bagi memperkenalkan Malaysia kepada dunia.

"Dengan adanya acara ini, kita harap orang lebih berminat untuk datang ke Malaysia.

"Malangnya hari ini cuaca berjerebu sedikit. Kalau tidak, mereka akan dapat lihat bagaimana hijaunya negara kita ini, dan begitu teraturnya rumah," katanya merujuk kepada rumah-rumah di sekitar tasik The Mines Resort City di Seri Kembangan di sini, termasuk rumah beliau sendiri.

Secara berseloroh, Dr Mahathir berkata beliau tidak bermaksud untuk mempromosikan rumah beliau itu.

Bercakap pada sidang media pada akhir kejohanan peringkat Malaysia itu, Dr Mahathir yakin acara itu akan menjadi sangat popular.

Beliau juga yakin tasik di The Mines Resort City amat sesuai dijadikan venue perlumbaan bot laju kerana airnya yang tenang.

"Malah saya diberitahu bahawa (apabila) berlumba di tasik ini, bot dapat dipandu dengan lebih laju," kata Dr Mahathir.

Perdana Menteri berkata orang ramai memberi sambutan menggalakkan kepada kejohanan Bot Laju F1 dunia itu seperti yang ditunjukkan kepada perlumbaan kereta F1 di litar Sepang dan Pameran Antarabangsa Maritim dan Udara Langkawi (Lima), yang turut menerima sambutan dari pihak luar.

"Saya yakin ramai orang termasuk pelancong asing akan mengunjungi tempat ini pada masa depan apabila ia sudah menjadi lokasi tetap," katanya.

Perdana Menteri berkata kerajaan sentiasa menyokong sebarang acara yang baik bagi Malaysia.

Malaysia, katanya, sedang berusaha untuk dipilih menjadi penganjur terbaik bagi kejohanan Bot Laju F1 Dunia itu.

Tahun lepas, Malaysia dipilih sebagai penganjur terbaik acara itu.

-- BERNAMA

AFY MFJ NAK